

**REGIONAL NEWS BULLETIN**

**HEADLINES (MORNING)**

1. Mizoram larsap Dr. Hari Babu Kambhampati chu Odisha larsap atana sawn a ni a, Gen. (Dr.) Vijay Kumar Singh chu Mizoram larsap thar atan ruat a ni.
2. Council of ministers thukhawm chuan Mizoram State University din a nih theihna atana duan Mizoram State University Bill, 2024 chu a pawm.
3. President leh Vice President-ten khua leh tuite Krismas chibai an buk.
4. UK Prime Minister Keir Starmer chuan Middle East-ah muanna a awm chhoh zel a beisei thu a sawi.

<><><>

**GOVERNOR**

Mizoram larsap Dr. Hari Babu Kambhampati chu Odisha larsap atana sawn a ni a, Gen. (Dr.) Vijay Kumar Singh chu Mizoram larsap thar atan ruat a ni.

Larsap thar General Vijay Kumar Singh hi kum 2010-2012 chhunga Army Chief lo ni tawh a nih bakah sipai officer hna a chawlhsan hnu-ah BJP zawmin sorkar laipui-ah minister nihna lo chelh tawh thin a ni a. Hmar chhak hmasawna puala din Development of North East Region (DoNER) minister pawh lo ni tawh a ni. Hei bakah hian Minister of State for Statistics and Programme Implementation te, Minister of State for External Affairs te leh Minister of State for Road Transport and Highways bakah kumin June ni 11 thleng khan Minister of State for Civil Aviation dinmun a chelh a ni.

Nimin tlai lama Rashtrapati Bhavan thuchhuahin a tarlan danin Odisha larsap Raghubar Das banna chu President Droupadi Murmu chuan pawmin a aiawh turin Mizoram larsap Dr Hari Babu Kambhampati chu a ruat a. President hian state 5 a larsap turte a ruat nghal a ni. Bihar larsap Rajendra Vishwanath Arlekar chu Kerala larsap atan ruat a ni a. Kerala larsap Arif Mohammed Khan chu Bihar-ah sawn a ni a. Union home secretary hlui Ajay Kumar Bhalla chu Manipur larsap atan ruat a ni. Larsap sawn leh ruat tharte hian an hna an zawm atangin an nihna an chelh nghal dawn a ni.

**(Desk)**

<><><>

**GOVERNOR CHRISTMAS MESSAGE**

Mizoram larsap Dr Hari Babu Kambhampati chuan Krismas leh Kumthar lo thleng tur pualin Mizoram mipuite chu duhsakna a hlan.

Krismas vuakveta khawtlang mipui tha taka an inphuarkhawm thin leh mahni tawng ngei maia Krismas hla an sa thin chuan hnam ziarang a tarlang tel a ni a ti a. Krismas hun chhunga induhsakna lantir na'na thilpek an inhlan thinte chuan Mizo mipuite thilphalna a pholang a, mi baihvai leh dawmkan ngai zawkte puala an luangchhuak thin chu entawntlak a nih zia thu a sawi a. Inlungrual taka Mizoram in Krismas a lawm tlang leh thei tur chu lawmawm a tih thu a sawi. Aizawl khawpui chu India ram khawpui zinga boruak thianghlim berah puan a nih thu a sawi a. Boruak thianghlim kan neih theihna tura hmalakna hi tun hunpui lo thleng turah pawh vawngnung tlat turin leh, boruak tibawhlawh lo zawnga Krismas leh Kumthar lawm za turin Mizoram mipuite a ngen thu leh mipuite chu dan leh thupek tha taka zawm chung a hunpui hman turin a duh thu a sawi a.

Larsap chuan tun Krismas pawh Mahni chhungte kianga hunpui hman ve thei lo tur midangte tana rawngbawlna hna thawk mek - sipai, hriselna lama thawktute leh adangte mi engemawzat an awm thu leh chung mite chuan mahni aiin midang an dah pawimawh hmasa a, Krismas awmzia leh nihna chiang takin an tarlang a, an ngaihsanawm takzet a ni a ti.

Prime Minister kaihhruaina hnuai a India chuan kum 2047 ah ram changkang leh intodelh 'Vikshit Bharat' nih tumin tan a la mek a ni a ti a. Hemi dinmun thleng tur hian Mizoram pawhin

mawhphurhna pawimawh tak a neih thu leh India ram hmasawna tur ruangam duanah Mizoram a tel ve a tul a. Hemi atan hian India Sawrkar policy leh programme-te ngaihven thin tur leh a hlawhtlin theih nana phur taka tawiawm turin a sawm a ni.

**(Corr)**

<><><>

**CM MESSAGE**

Chief Minister Pu Lalduhoma chuan Mizoram chhung leh ram pawna cheng zawng zawngte Krismas leh Kumthar lo thleng tur chibai a buk.

Kumin Krismas lo thleng tura hmangaih chan ta te lungngai leh khawhar taka hun hmangte tan an awm thu leh an tan Pathian thlamuanna leh awmpuina a dil thu a sawi a. Natna avanga ramchhung leh pawna awm te, mahni inchhung pawh chhuahsan hleitheh lo a awm te pawh a rilruah an awm reng a. Mizoram chhehvela cheng Zofate chenna hmuna harsatna thleng mek avangin unau tamtak ten in leh lo an chan a, himna zawngin Mizoram leh hmun hrang hrang an pan a ni a ti a. Raltlante pawh Mizo mipuite'n an hriat reng thu leh an tana an tawngtai nasat thu a sawi a. Zirna leh eizawna avanga rampawna awm zawng zawng te, Mission field a thawk zawng zawngte pawh Mizo mipuiten an hre rengin Hlim leh lawm taka Krismas leh Kumthar hmang turin duhsakna a hlan thu a sawi.

CM Pu Lalduhoma chuan Krismas chu Pathian thilthlawn pek khawvelin a dawn ni a nih avangin a hniakhnung zuia he hun puala mimal harsate tana luangchhuak, mimal leh tlawmngai pawl tam tak an awm a hriat thu a sawi a. An thil tih chuan rilru a tihhlim thu leh Isua Krista hnungzuitute nihlawhzia a hmuhtirin Zofate kan inhmangaihzia pawh a tilang a ni, a ti a.

CM chuan Krismas chu Inremna Ni a nih thu leh nupa inremna ni, unau inremna ni, thenawm khawveng inremna ni, ram leh hnam inremna ni atana hmang ve turin Mizo mipuite a sawm a. Krismas zawh huna Kumthar chuangkai hunah pawh Mizo mipuite tan kum tha a nih ngei theihna turin duhsakna a hlan thu a sawi a. Pathian kaihhruaina leh mipuite zarah ZPM sorkar pawhin kum khat a lo tling ve tawh thu a sawi a. Mipuite'n sorkar an thawhpuiinaah lawmthu a sawi baw a ni.

**(Corr)**

<><><>

**LYNCHING**

Airfield khua ami David Lalmuanpuia (31) an khawtlang VDP/Kumpulan te'n kut an thlak avanga a thi ni a thubuai kal mekah Airfield khaw mi 5 man belh leh an ni.

Police hotute hnen atanga thu dawn danin Thawhtanni khan David Lalropuia (27), Lalramhluna (56), Lalkhawngaiha (28), Lamneihpauva (40) leh Lalhmingliana (40) te chu Police te'n an man a. Bawngkawn Police Station-a December ni 19-a Bharatiya Nyaya Sanhita (BNS) section 105, sub section 3(5) hmanga thubuai ziah luh tlawhchhana man an ni a. He'ng an mi man 5-te hi nimin khan Aizawl district court-ah hruai an ni a, court thutlukna angin Central Jail-ah d ahluh nghal an ni. Heti hian nghaisak rawn a nih avanga nunna chan ta David Lalmuanpuia thih chungchangah Airfield khua ami mi 8 man an ni ta a. Pathianni khan Airfield khua ami vek an VDP hruaitu K.T Zonunsanga (31) leh R. Lalhmangaihzuala (56) te chu Police-in man tawhin jail-ah thawn an ni tawh a ni.

Police hnena David Lalmuanpuia nu Pi Nunthangmawii FIR thehluh dan chuan a fapa hi December ni 18 zan khan Pastor chenna in rawk a nih chungchangah ringhlelin VDP/Kumpulan hruaitute'n VDP pisa-ah an hruai a. An dawpna lamah hliam na tak tuarin a theih tawka dan a tum pawhin a hlawhchham a, Damdawiin-a an hruai hnu-ah zing dar 1 hnu-ah Greenwood Damdawiina thi a puan a ni ta a ni.

**(Desk)**

<><><>

**AIR NEWS ON SOCIAL MEDIA**

Chanchintha hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchintha hi ngaihthlak leh chhiar theih a dah a ni.

Chaghnu dar 2 leh a chanve-ah Chanchintha puan leh a ni ang.

**(NSD)**

<><><>

December ni 20-a council of ministers thukhawm chuan Mizoram State University din a nih theihna atana duan Mizoram State University Bill, 2024 chu a pawm.

Hemi rual hian Mizoram a state university din tur chu council of ministers thukhawm hian a pawm a. National Education Policy 2020 chuan state university la nei lo zawng zawng state-te chu din vek turin a ti a, chutiang chuan kalpui a ni. Mizoramah hian university pahnih – Mizoram University leh ICFAI university a awm a, Mizoram University hi central university a ni a, ICFAI hi private university a ni bawk si a, state university a la awm loh avangin din a ngai ta a. He tia state university dinna tur pawm a nih takah hian assembly inkhawm lo awm leh turah Mizoram State University Bill, 2024 hi pawm tura chhawpchehuah a nih rin a ni.

Ni 20 December a Chief Minister Pu Lalduhoma kaihhruaia Council of Ministers thukhawm chu zan thlenga an thutkhawm avang leh a tuk Inrinni-ah Chief Minister hi Agartala, Tripura a NEC plenary session vawi 72-na a a kal bawk si avangin sorkar thuchhuah tura phalna an hmuh hman loh avangin tlai khaw hnu-a tihchhuah a nih tak thu sorkar thuchhuah chuan a sawi.

**(DIPR/Desk)**



**THE PRESIDENT AND THE VICE PRESIDENT HAVE GREETED CITIZENS ON THE EVE OF CHRISTMAS**

President leh Vice President-ten khua leh tuite Krismas chibai an buk.

President Droupadi Murmu-i chuan Isua Krista chu mipuite thinlunga hmangaihna leh inremna thuchah kengtu a ni a ti a. In unauna leh mitin tana chanchin tha a zirtirnte chu khawvel tha zawk siam tura chhit en a la ni reng a ni a ti a. He humpui hian inpumkhatna leh muanna thlen turin mi thintlungah thu a sawi a ni a ti a. President chuan he humpui hian inrin tawwna te, ngaihdamnate khawvel hmun tinah thlen sela, mitin hnukhnaitu lo ni rawh se a ti bawk.

Vice President Jagdeep Dhankhar-a chuan Krismas hian mitin thinglungah beiseina, lainatna leh lungrual taka inpumkhatna thlen theuh rawh se a ti a. Isua Krista zirtirna khan hunbi tina chengte a hne rem zel a. Mi dangte nun hriatthiamna te, mi zawng zawng inzah tawwna pawimawhzia te hi a thuken bulpui pakhat a ni a, hei tak hi India danpuia - inunauna, intluktlanna leh rorelna dik (fraternity, equality and justice) tih nen pawh a inhmuh rem hle a ni a ti.

*(NewsOnAIR)*



**UK PM KEIR STARMER HOPES FOR MIDDLE EAST PEACE IN 1ST CHRISTMAS MESSAGE**

UK Prime Minister Keir Starmer chuan Middle East-ah muanna a awm chhoh zel a beisei thu a sawi. Krismas thuchah a tihchhuahah UK Prime Minister chuan Middle East-ah chuan hma lam hun tha zawk kawh a en a beisei thu a sawi a. Middle East, Isua pianna ramah hian inngirrhona nasa tak awm thin mah se; muanna a awm chhoh a beisei tlat thu a sawi a ni.

Tun tum hi Prime Minister a nih hnua Keir Starmer-a'n Krismas thuchah a tihchhuah hmasa ber a ni a. Midang tana an hun leh tha sengtu sipai leh ral hmatawnga awm thinte a bik taka duhsakna a hlan thu a sawi.

*(NewsOnAIR)*

